

- चिकित्सा मंत्री गजेन्द्र सिंह खींवर कह्यो —देश मांय एचएमपी वायरस रा कुछ मामला सामी आया, पण घबरावण री जरूरत नी है।
- राज्य सरकार बैंक ऑफ बड़ौदा अर बैंक ऑफ महाराष्ट्र सागे करार कीना— दोन्यू बैंक 30 हजार करोड़ रुपया रा कर्ज देवेला।
- केन्द्रीय सड़क परिवहन मंत्री नितिन गडकरी विद्यार्थियों ऊं यातायात नियमां री पालना करण बाबत कह्यो।
- गुरु गोबिंद सिंह रा प्रकाश परब रे मौके गुरुद्वारां मांय आज अरदास अर शबद कीर्तन रा आयोजन राख्यी ज्या।
- राज्य मांय पारो 2 ऊं 4 डिग्री सेल्सियस ताई उतर्यो।

000

चिकित्सा अर स्वास्थ्य मंत्री गजेन्द्र सिंह खींवर कह्यो है के देश रा कुछ राज्यां मांय ह्यूमन मेटान्यूमो वायरस (एचएमपीवी) रा कुछ मामला सामी आया है, पण घबरावण री जरूरत नी है। खींवर कह्यो के चिकित्सा विशेषज्ञां रे मुजब ई वायरस रे कारण मौत रो कोई मामलो नी मिल्यो है। वे बतायो के स्वास्थ्य अर परिवार कल्याण मंत्रालय री ओर ऊं आज ई वायरस रा बारा मांय सगळा राज्यां रा स्वास्थ्य सचिवां सागे वीडियो कॉन्फ्रेंस रे मार्फत मीटिंग राख्यी ज्यी जिण मांय ई ई वायरस रे घणो नुकसान नी करण रा बारा मांय जाणकारी दीरीजी। चिकित्सा मंत्री कह्यो के केंद्र सरकार रे मुजब एचएमपी वायरस रो फिलहाल कोई मामलो नी है, पण एहतियातन प्रदेश मांय ई सावचेती राखण रा हुकम दिया ज्या है। वे बतायो के प्रदेश मांय ई वायरस री प्रामाणिक जांच एम्स जोधपुर, सवाई मानसिंह अस्पताल जयपुर, आरएनटी मेडिकल कॉलेज उदयपुर, सरदार पटेल मेडिकल कॉलेज बीकानेर अर एसएन मेडिकल कॉलेज जोधपुर री वीआरडीएल लैब मांय करायी जा सके है। ई बीचे चिकित्सा अर स्वास्थ्य विभाग री प्रमुख शासन सचिव गायत्री राठौड़ बतायो के डूंगरपुर मांय बगत ऊं पैली जन्म्या दो महीना रा एक टाबर मांय एचएमपी वायरस रा लक्षण मिल्या है, जिण रो गुजरात रा अहमदाबाद मांय ईलाज चाल रह्यो है अर वां री हालत ठीक है। स्वास्थ्य विभाग रा निदेशक डॉ. रवि प्रकाश माथुर आकाशवाणी ने बतायो के ई वायरस ऊं घबरावण री जरूरत नी है, पण सांस ऊं जुड़ी तकलीफ व्हेवण परां डॉक्टर री राय लेवणी चाहिजे।

.....

प्रदेश मांय पड़ रही जोरदार ठण्ड अर मौसमी बीमारियां ने ध्यान राखता थकां स्वास्थ्य विभाग सावचेत कीना है। महकमा रे मुजब कोविड, स्वाइन फ्लू अर इन्फ्लुएंजा रा मरीजां सारु न्यारा ओपीडी अर आईपीडी री व्यवस्था तैय करण रा निर्देश दिया ज्या है। ई सागे ई कोविड रा मामला सामी आवण परां संबंधित नमूना री जीनोम सीक्वेंसिंग करावण बाबत ई कही ज्यो है।

000

मुख्यमंत्री भजनलाल शर्मा कह्यो है के राज्य सरकार 'विकसित राजस्थान 2047' रा तैत पांच साल री कार्य योजना बणा र सगळां रा विकास सारु काम कर रही है। वे कह्यो के ई कार्य योजना रा तैत आवता बगत सारु बुनियादी ढांचा रा विकास अर प्रदेश री माली व्यवस्था ने साढ़े तीन सौ बिलियन डॉलर री बणावण सारु काम करण समेत दस संकल्प तैय करी ज्या है। श्री शर्मा आज वां

रा रेहवास माथे बैंक ऑफ बड़ौदा अर बैंक ऑफ महाराष्ट्र सागे राज्य सरकार रा करार माथे सही करण रे मौके बोल रह्या हा। करार रे मुजब आवता छह साल मांय बैंक ऑफ बड़ौदा हर बरस 20 हजार करोड़ रुपया अर बैंक ऑफ महाराष्ट्र हर साल 10 हजार करोड़ रुपया रा कर्ज मुहैया करावेला। आ रकम सरकार री बिजली अर नवीकरणीय ऊर्जा, सड़क, पीवण रा पाणी अर साफ सफाई ऊं जुड़ी न्यारी-न्यारी परियोजनावां सारु काम ली जावेला।

000

राइजिंग राजस्थान ग्लोबल इन्वेस्टमेंट समिट रा तैत करी ज्या 1 हजार करोड़ रुपया ऊं बत्ती रकम रा करार माथे काम सुरु करण रा बारा मांय विचार सारु आज समीक्षा बैठक राखी जा रही है। मीटिंग मांय मुख्यमंत्री भजनलाल शर्मा खेती-बाड़ी, भणार्इ-लिखाई, सूचना प्रौद्योगिकी, उद्योग, स्वास्थ्य, खनन, पर्यटन, नगरीय विकास अर आवासन विभाग रा 124 करार रा बारा मांय अहलकारां सागे विचार कर रह्या है। ध्यानजोग है के लारला साल 9 ऊं 11 दिसम्बर तांई व्ह्या राइजिंग राजस्थान निवेश सम्मेलन रा तैत 35 लाख करोड़ रुपया ऊं बत्ता करार करी ज्या हा।

000

लोकसभा अध्यक्ष ओम बिरला आज नई दिल्ली मांय पंचायत से संसद कार्यक्रम रा दूजा दौर रो उद्घाटन कीनो। ई कार्यक्रम रो मकसद पंचायतीराज संस्थावां री अनुसूचित जनजातियां ऊं चुणी ज्यी महिला प्रतिनिधियां ने मजबूत बणावणो है। ई कार्यक्रम मांय बीस राज्यां अर केन्द्र रा राज वाळा प्रदेशां री पंचायतीराज संस्थावां ऊं चुणी ज्यी करीब पांच सौ महिला प्रतिनिधि सिरकत कर रही है।

ई मौके श्री बिरला कह्यो के पंचायती राज संस्थावां गांवां रा विकास सारु काम करता थकां खुद रे पाण ऊबा भारत रा नजरिया ने सांचो कर रही है।

000

केंद्रीय सड़क परिवहन अर राजमार्ग मंत्री नितिन गडकरी विद्यार्थियां ऊं यातायात नियमां री पालना करण रो आग्रह कीनो है। वे मुंबई मांय एनएचएआई कानी ऊं सड़क सुरक्षा अभियान 2025 रा 'सुरक्षा रीलोडेड' कार्यक्रम मांय बोल रह्या हा। श्री गडकरी सड़क हादसां रा आँकड़ां री जाणकारी देता थकां बतायो के लारला साल स्कूल अर संस्थागत हलकां मांय व्ह्या हादसां मांय दस हजार जणा री मौत व्हे ग्यी। वे कह्यो के विद्यार्थियां ने नियमां री पालना करणी चाहिजे, जिण ऊं विद्यार्थी खुद सागे दूजां री हिफाजत मांय ई मददगार साबित व्हेला।

000

चिकित्सा अर स्वास्थ्य मंत्री गजेन्द्र सिंह खीवसर कह्यो है के गांव-ढाणी तांई ईलाज रा सुबीता मुहैया करावण सारु नर्सिंग अर पैरामेडिकल स्टाफ रा रीता ओहदां माथे बेगी ई नियुक्तियां करण री कोशिश कर रही है। श्री खीवसर आज जयपुर मांय राजस्थान नर्सिंग काउंसिल परिसर मांय प्लोरेंस नाइटिंगेल री मूरत रा अनावरण जळसा मांय बोल रह्या हा। वे कह्यो के चिकित्सा विभाग मांय महिलावां, दिव्यांग अर गंभीर बीमारियां रा मरीज कर्मचारियां रा तबादला माथे खास ध्यान दियो जावेला। चिकित्सा मंत्री कह्यो के मुख्यमंत्री आयुष्मान योजना रा तैत दूजा राज्यां रा रेहवासियां ने राजस्थान मांय अर प्रदेश रा लोगां ने दूजा राज्यां मांय ईलाज रो सुबीतो मुहैया करावण बेगो ई पोर्टेबिलिटी रो सुबीतो दियो जावेला।

000

एसआई भर्ती 2021 मांय पास व्हे र सिखावण ले रह्या एसआई ने फील्ड ट्रेनिंग माथे भेजण रा मामला मांय हाई कोर्ट राज्य सरकार ने हर हाल मांय 18 नवंबर रा स्टे रा हुकम री पालना करण रा हुकम दीना है। अदालत ट्रेनी एसआई ने फील्ड ट्रेनिंग माथे भेजण रा पुलिस मुख्यालय रा हुकम रा बारा मांय हाईकोर्ट मांय दायर अर्जी री आज सुणवाई करता थकां ओ हुकम दीनो। सरकार री ओर ऊं महाधिवक्ता राजेंद्र प्रसाद कचहरी मांय कह्यो के मामला री जांच करी जा रही है। वे कह्यो के करीब 800 एसआई सिखावण ले रह्या है, ज्यां मांय ऊं कुछ गलत व्हे सके है पण सगळा ने सिखावण लेवण ऊं रोक्या जा सके है। मामला री आगली सुणवाई गुरुवार ने व्हेला।

अर्जी देवण रा वकील हरेंद्र नील बतायो के हाईकोर्ट सरकार ने यथास्थिति बनायी राखण बाबत कह्यो है।

000

सिख पंथ रा दसवां गुरु अर खालसा पंथ चलावण वाळा गुरु गोबिंद सिंह रा प्रकाश परब रे मौके आज प्रदेश मांय न्यारा-न्यारा कार्यक्रम राख्यी ज्या। गुरुद्वारां ने सोहवणी रोशनी ऊं सजायी ज्या है। राजधानी जयपुर मांय राजापार्क, हीदा की मोरी अर वैशाली नगर समेत न्यारा-न्यारा गुरुद्वारां मांय लंगर बरती ज्या अर गुरु ग्रंथ साहिब रा अखंड पाठ, अरदास अर शबद कीर्तन रा कार्यक्रम राख्यी ज्या। झालावाड़ रा झालरापाटन मांय प्रभात फेरी निकाळी ज्यी अर अस्पतालां मांय फल बांटी ज्या। पाली जिला रा सुमेरपुर रा गुरुद्वारा मांय पौधा रोप्यी ज्या। भरतपुर रा गुरुद्वारा मांय गुरबाणी रा कार्यक्रम राख्यी ज्या अर पाईबाग गुरुद्वारा मांय रागी जत्था शबद कीर्तन कीनो। डीग रा गुरुद्वारां मांय फूलां ऊं सोहवणी सजावट सागे शबद कीर्तन रा कार्यक्रम राख्यी ज्या, प्रभात फेरी निकाळी ज्यी अर लंगर बरतायी ज्या। हनुमानगढ़ रा सुक्खा सिंह मेहताब सिंह गुरुद्वारा मांय संगत मत्थो टेक र देश मांय खुशहाली री कामना कीनी। म्हाणा श्रीगंगानगर खबरनवीस बतायो के जिला रा बूढा जोहड़ मांय खास दीवान सजायी ज्या है अर अटूट लंगर री व्यवस्था करी ज्यी है।

.....

राष्ट्रपति द्रौपदी मुर्मू अर प्रधानमंत्री नरेन्द्र मोदी जनता ने गुरु गोबिंद सिंह रा प्रकाश परब रे मौके शुभकामनावां दीनी है। राज्यपाल हरिभाऊ बागड़े अर मुख्यमंत्री भजनलाल शर्मा ई जनता ने बधाई दीनी।

000

राज्य मांय आज केई ठोडां बादळा मंड्या रह्या अर सीळो बायरो बाज्यो। इण ऊं गळन अर ठिटुरन बध ग्यी है। मौसम विभाग रे मुजब पारो 2 ऊं 4 डिग्री सैल्सियस उतर्यो है। माउंटआबू मांय न्यूनतम तापमान 3 दशमलव 8 डिग्री अर जैसलमेर मांय 6 दशमलव 1 डिग्री सैल्सियस दर्ज करी ज्यो। ई बीचे आज करौली, भरतपुर अर सवाईमाधोपुर समेत केई ठोडां घणो कोहरो रह्यो। शीतलहर रा हालात ने ध्यान राखता थकां दौसा मांय जिला कलेक्टर सगळी सरकारी अर गैर सरकारी स्कूलां मांय पहली ऊं 8वीं कक्षा ताई रा बच्चां सारू काल छुट्टी रो ऐलाण कर दीनो है।

000